



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Taoba Bangladesh chief justice kum 11 tepuokdak ayutsu

Meghalaya CM Conrad-i 'Eastern West Khasi Hills' district lapoktsu



VOL. XIX ONO. 34 (ADOK 34) DIMAPUR YANGTEPNÜ (THURSDAY) YIMPOKSÜI (NOVEMBER) 11, 2021

₹ 5.00

COVID-19 Nagaland: Nisung 32000 tatonger; Nisung 692 süogo

Kohima, November 10, 2021 (TYO): Nagaland nung Bodbarnü nisung 9 dak COVID-19 putet, 12 taneptsü angu aser nisung 3 asü.

"Tanü puteteremji Dimapur nung nisung 6, Mokokchung nung 2 aser Kohima nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüingda nisung 12 dak COVID-19 aliba putet. Parnokji Dimapur nung 7 aser Kohima nung 5 lir" ta pai ashi.

Nisung 31,960 rongnungi 30,047 taneptsü nguogo aser ibaji taneptsü angur 94.01% lir, ta paisa ashi.

"Tang nisung 172 anepaludar saka parnok 142 dakbo shirangba yimya kecha mali" ta Dr Kikon-isa shisem.

Bodbarnü COVID-19 puteta alir nisung 3 asü. Parnokji Dimapur

nung nisung 2 aser Mokokchung nung 1 liasü aser tena züingsema tasür ajak agi 692 kumogo.

"Mongulbar tashi nung nisung 715,411 nem COVID-19 vaccine indang dose 12,26,953 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,965, healthcare workers 15,998, arishi kum 45 ser tempur 203,172 aser arishi kum 18 nungi 44 tsüingda alir 435,276 lir, ta paisa ashi.

Vaccine agirtem rongnungi nisung 511,542-i dose anaprong agiogo. Parnokji frontline workers 48,127, healthcare workers 13,442, arishi kum 45 ser tempur 165,134 aser arishi kum 18 nungi 44 tsüingda alir 284,839 lir, ta Dr Thurr-i metetdaksü.

NCD-i Dr S.C Jamir tushir

Dimapur, November 10, 2021 (TYO): November 8, 2021 nü India Tiri Dr S.C Jamir nem Padma Bhushan agütsüba atema tenüngsang agütsür ta Naga Council Dimapur (NCD)-i metetdaksü.

"Naga nunger yimsüsür tejen, taoba Governor aser pezüben tashi Chief Minister nem iba sempet agütsüba atema kanga nüma atanger aser pa nem

tetushi agütsür. Pa nem anema aliba takum, shisatsü aser arishi moajangma" ta NCD-i ashi.

"Maneni, NCD lenisüba kübok Airport Dimapur nung Dr S.C Jamir pelaa agizükba sentong nung shilem agiba atema kin tirtem aser civil society balala dang pelaba shisemer" ta President Etsungmomo Kikon-i sangdong nung ashi.

NAYO-i Assam Rifles den amalitep malitsü

Kohima, November 10, 2021 (TYO): October 29, 2021 nü NAYO President Roko Angami'er mita aoba anema Northern Angami Youth Organisation (NAYO)-i Assam Rifles den amalitep kecha malitsü bangzüngogo.

Ist Assam Rifles sepaitemi Zadima nung NAYO president Roko Angami'er mita aoba aitsür, ta NAYO vice president Visakhoto Tsira aser general secretary Ruokuoneitso Kire nati ashi.

Ki mita aodang Assam Rifles-i taitüsü aketba kecha mangu, ta parnok ashi.

"Yimsüing 32 nungi adenshiba Northern Angami Youth Organisation lanurtemi Indian Army-i tesempatsü mapa inyakba khukhua aitsür" ta NAYO-i sangdong ka nung ashi.

Assam Rifles-i iba mesükba mapa tamajung inyakba manenra Angami Youth Organisation (AYO)-i amalitep kecha malitsü lemteba ama NAYO-ia bangzüngogo.

Northern Angami tesem nung lanur shingai Assam Rifles ajanga ayongba sentong kecha nung shilem magitsü metetdaksür ta parnokisa ashi.

NAYO-isa unit aser züingsem ajak dang tiyazü osangtem mebelenshitsü metetdaksü aser tashi mangartem NAYO Yazhabo kübok merenshitsü, ta mendenpurtemisa ashi.

"Ist Assam Rifles-i parnok nem osang sangoktsür tenüng metetdaksütsü akhanger aser Assam Rifles-i iba mapa inyakba atema yimjak nung tatok meshitsü" ta NAYO-isa metetdaksüogo.

Kohima police-i garitem mita repranger

Kohima, November 10, 2021 (TYO): Kohima Traffic Police-i garitem nung ozüing alema LED lights, black films aser sound boosters amshiba mita aoe.

"Covid-19 wara mapang garitem nung black films aser ozüingi noktangbatem kanga bulua amshitsü tenzüngogo aser iba jagi onoki gari aser two-wheelers mita repranger" ta DSP (Traffic) Manom Wallim-isa ashi.

Hombar nungi Traffic Police aser DEF Kohima-i Police Headquarters Junction nung garitem mittsü tenzüng.

"Garitem nung black films aser two-wheelers nung sound booster silencers amshitsü ozüingi lemalar. Tang atema police-i LED lights aser black films endoktsür aser sound boosters alirtem apuba sülen normal silencers melendaktsür ang chioker. Ano, high sound horns endoktsür" ta Manom Wallim-isa ashi.

"Police-i maneni garitem mita reprangtsü anungji nübertemi gari nung extra led lights aser sound boosters mamshitsü mepishir" ta DSP (Traffic)-isa metetdaksü.

ASTD-i Dr SC Jamir tushia agizük

"Ao kin nung anü tasen adokdaksünura, mepet süshidaksüdi aser Tsüngrem bushidi" - Dr SC Jamir



Bodbarnü Dimapur Airport nung Ao Senso Telongjem Dimapur (ASTD)-i Dr. SC Jamir aser pa kinungtsü pelaa agizük dang agiba noksa angur. (Dimapur, November 10)

Dimapur, November 10, 2021 (TYO): Dr S.C. Jamir-i Padma Bhushan konang agizükba sülen Bodbarnü Delhi nungi meyipa arudang Ao Senso Telongjem Dimapur (ASTD)-i Dimapur airport nung pa pelaa agizük.

Naga nunger yimten yimsüsür kati Padma Bhushan konang mezüng agizükba pa lir.

Taoba Governor aser Nagaland chief minister Dr. S.C Jamir-i November 8 nü New Delhi nung India Tir ket nungi Padma Bhushan konang agizükba liasü.

Tanü Dr. S.C Jamir pelaa agizüktsü atema Dimapur airport aser telongtet nung aser ano NH-29 nung Chumukedima tashi Aor tebur aser tetsürtem noklang aika pei sobaliba sübotsü agir adenshi.

Dimapur airport nung pa pelaa agizükba sentong tatsüka agiba sülen Chumukedima nung par kidangi meiner ao.

"Ao kin nung anü tasen adokdaksünura, mepet süshidaksüdi aser Tsüngrem bushidi" - Dr SC Jamir

Chumukedima nung sentong ka agidang Dr. S.C Jamir-i tayongzüka tulu agütsü.

1958 kum May ita Ungma nung Naga Peoples Convention amongdang Dr. S.C Jamir-i jembiba onük ka lephsia tanü pai jembia liasü.

"Iba onük jembir kum aika süiaka ibai lephsia ashitsüsa akümer kechiyong temelenshi kecha mali" ta pai ashi.

"Asenok meimchir molungjang nung aser asen loktiliba nung asenoki chiyungtsü tajungtiba agüja shiruru asem mesür aser itemji shingo (ape), gado (donkey) aser keyi (tiger) lir. Naga nungeri aser Ao kinia item shirura mesür aser shiruru asem nungi asenok mejenteter" ta Dr. S.C Jamir-i ashi.

"Shingo tetezüji mangatetba, memetetba tia nung aliba shisatsü. Tanabuba nung gado tetezüji pai noktaka lia oang ta shira mapusotsü saka pai makoktsüsa khu benloktsüra aotsü. Pa nentetsüsa khu meinoktsü tashi marakzur. Tasembuba nung keyii lir aser keyi jagi taküm aliba nguseta azü ajemer aser shi achir" ta pai ashi.

Aortemi tanü tia indang

mejembii tejen otsü jembiba ajanga meputep ang adoker. Ao lima nung koba lokti südir süaka Longtrok-Chungliyimti otsü dang ashi tanü tia kechi lir, koma lia aotsü indang mejembir aser iba ajanga meputep ang talila adoker, ta paisa tebilemtüsü ka lemsatet.

Asenok putu 21 buba nung alir aser alima kanga ainer. Tangarbo itai atuba sülen iba den temabai atutsü meranger. Tanü putu ya tejakleni aoba putu lir saka Ao lima lipok, kin-kidong indang aser akhidang atalokba indang jembidang asenok tsüingda meputep ang adoker, ta Dr. S.C Jamir-i metetdaksü.

"Tanga kinbo Nagaland syllabus nung ozü kin nungi yamai liasü ta azünger, saka Aorbo Mongsen lipok, Chungli lipok ta meputep adoker alidang Nagaland putiotsü nung Aor otsüba mali. Iba ya asenok kechiba asenok shingo tia nung aliba ajanga lir" ta paisa ashi.

"Oboula nungeri jembibaji otsü, obala nungeri jembibaji ataloka aruba otsü saka tanü ya item otsü jembibaji putu ka masü saka lanurtemi putiotsü yangluba putu ka lir. Anungji lanurtemi alima koda aoe, linük koda aoe ta sademsadema bilema inyakra, idangji Aortem longjemtsü aser kin-kidong meputep amadoktsü. Tanü lanurtemi kodaser Aor ajungkettsü, tejakleni aotsü ta bilema inyaktsü" ta paisa ayongzüng.

"Ao kin ya tajemrepba kin masü, lanurtemi tekolok techira, tashirtem lir saka taintemi parnok inyaktsü aser jembibaji asoshi lenmang melapoktsür. Tamburi ashibajia angatsü saka tanü putu den putepa asenoka anidaktsü, saka tejen otsüji dang jembidi aser iba sülen anidakdi ta süra asenok tajemrepba kin akümtsü" ta pai ashi.

"Tangari maginü nunga agitsüsa lanurtemi alitsü, ma asü nunga hao ta asütsüsa, metsüdokdi ta asü nunga memetsüdoktetsüsa alitsü. Shisaliok bushiba nunga first division masü gold medalist angurtem aser tanga wadang balala nunga tajungtiba asütsü merangtsü" ta Dr. S.C Jamir-i lanurtem ayongzüng.

Israel linük ya tila ka dang aser parnok meketa Arab linük tulutem lir, saka Israel-i temeket linüktem aramoktsü aser parnok dang temaba litettsü tangatetba nung liyonga arur. Linük tilatiba süaka parnok dak iba temolungtetba aliba ajanga liteta arur. Senso shiai pei linük atema kodaser tajungtiba inyaktüsü ta angateta aliba ajanga tangari Israel linük mamokbangteter. Anungji Aor dak-a iba tangatetba nung aser temolungtetba alitsü nungdaker, ta paisa metetdaksü.

Asenoki tangar dang nungi alaka junga inyaktüsü. Kodang asenoki taküm litettsüsa tangar dang nungi alaka litetdi, asenoki tangar aramoktsü, ta pai shisem.

Lanurtem sademsadema parnoki metetba yari aintsü atema asenoki yimjung agi meinprongba agiendi. Yamaji süra Ao kin shia arutsü, Aor dak yimli lir aser Naga lima sünepdaksüdi ta sürabangla Ao kin nungi ochi tanishirtem adokdakang ta sarasademtsüla aser iba alizüngji ayutsüla, ta Dr. SC Jamir-isa ashi.

"Asenoki alu meyimmür aser ibaji kechiba ta süra meshimetsüba yimya sübaba ajanga lir. Asenoki mapa meinyaki sen aginür aser India sorkar dak imlar. Ano, alu inyaktüsü atema hajira anir ao nung chi asemen chiyungtsü aser aja gari nung anir orr arutsüla. Tangar tashirtemi hajira meshiba ama yimdaklirtemia kasa taa meshir. Iba ya asenok sasa asenok tekong nung aranger anungji iba tangatetba endoktsüla" ta paisa metetdaksü.

"Asenoki mesüba tanabuba shiruruji gado lir aser ibaji tangari nungja ta ashi nunga masü'ar ta asüba 'conservative' tangatetba aliba lir. Ni bilemba dang agitsü ta asüba tangatetba. O ka jembili lipok otsü dang jembili, lipok o dang jembili ta süa tejakleni aotsü memolungba tangatetba ya agientsüla" ta Dr. SC Jamir-isa metetdaksü.

"Tasembuba nung asenoki keyi tepsettsüla. Naga lima nung azütokshitepba agi talitsü majung. Asenok o asenok na tepsetteper. Kechiba süra keyi ya asenok ajak temolungjang nung lir. Naga lima nung yimjung adoktsü atema, teputep adoktsü atema, tesünep arutsü atema nisung ajaki pei dak bona aliba keyi tepsettsüla. Asenok dak aliba temenen tulutibaji azütokshiba aser iba bilemba keyiji lir" ta paisa ashi.

"Tejakleni aoba kin ka asütsü atema tangar koloni aoe ibaji reprangtsüla. Oboula aser obala nunger asenok nem toktsüba sempetji ochi, tasü tait aser meranga inyakba lir. Itemji Padma Bhusan sempet dang nungi kanga agi tajungtiba aser tematiba lir saka asenoki item sempet samadaksür" ta Dr. SC Jamir-isa shisem.

(Maneni tapak 2 nung...)

CEO Nagaland-i Kohima nung Electoral ketdangsür den senden amen



Chief Electoral Officer, Nagaland, V. Shashank Shekhar IAS; Deputy Commissioner, Kohima, Gregory Thejawellie NCS aser dangartem DC indang Conference Hall, Kohima nung November 10, 2021 nü senden amenba mapang tangokba noksa ka yangi angur.

Dimapur, Yimpoksüi/Nov. 10 (TYO): Chief Electoral Officer, Nagaland, V. Shashank Shekhar, IAS den Chief Electoral Officer's Office nungi ketdangsürtemi Kohima district nung aliba DEO, ERO aser EROS, Recognised/Registered political party nungi lenirtem, Civil Society

Organizations/NGOs aser BLO Supervisors aser BLOs tem den senden ka November 10, 2021 nü Deputy Commissioner, Kohima indang Conference Hall nung mena liasü.

Iba senden nung tang teinyakdak Photo Electoral Roll indang Special Summary

Revision dak sendakba onüktem jembia liasü. Iba mapang Electoral Roll shidak aser temürek yanglutsü, election machinery ajanga timtem balala ajuruba, Election Commission of India ajanga totuyuba agütsübatem timi mapa kuma inyaksü indang jembia liasü.

NBSE ajanga Painting competition atema metetdaksür

Kohima, Yimpoksüi/Nov. 10 (TYO): Nagaland Board of School Education kübok zülüoka aliba Heads of Institutions ajunga dang sangdong ka nung metetdaksüba agi, kaketshirtem energy wazüka ayutsü asoshi ajungmesotsü nükjidong nung Ministry of Power, Government of India ajanga 2005 küm nungi küm shia School, State aser National Level Painting Competitions ayongzuka arur.

Iba sentong ya Ministry of Power tenüng nung Bureau of Energy Efficiency (BEE) ajanga Ministry aser State Education

Departments kübok CPSUs tem teyari nung ayongzuka arur.

Iba painting competition yagi kaketshir, tesayur aser tsüraburtemi energy wazüka ayutsü angatetdaksüba nung tali shilem agitsü.

India nunger nüjiso ngur küm 75 ajungba benjongnung nüngtem nung taküm "Azadi Ka Amrit Mahotsav-Energy Efficient India" omen nung ajemdaker NBSE kübok Heads of Institutions ajunga dang kaketshirtem iba tetoktepba nung shilem agitsü ajungshitsü totuyuba agütsü.

Iba sentong nung Group 'A' kübok class 5, 6 aser 7 nung azüngertem aser Group 'B' kübok class 8, 9 aser 10 nung azüngertem shilem agitsü temsüa lir.

Iba tetoktepba State Level Competition nung shilem agitsü atema online registration ya November 1, 2021 nungi November 30, 2021 tashi lapoka alitsü. Iba Painting Competition tejangja aser State Nodal Officer tem tenüngtem ya www.beeindia.gov.in nung upload süja lir.

Kohima College nung CATC-38 tenzükogo



Kohima College nung November 8 nungi 14, 2021 anogotem nung Combined Annual Training Camp (CATC-38) ka 24 Nagaland (I) Coy NCC, Kohima ajanga ayongzuka lir.

Dimapur, Yimpoksüi/Nov. 10 (TYO): North East Region indang Gp HQ NCC Kohima kübok 24 Nagaland (I) Coy NCC, Kohima ajanga Combined Annual Training Camp (CATC-38) sentong Kohima College nung November 8, 2021 nungi tenzükogo.

Iba training camp nungya Officer ka, JCOs ana, NCOs pungo, NCC Officer pezü aser 24 Nagaland (I) Coy indang Senior Division aser I Nagaland Girls Bn of Kohima NCC Group indang Senior Wing nungi cadet 230 shilem agir.

Iba Camp ya November 8, 2021 nungi November 14, 2021 tashi alitsü.

24 Nagaland (I) Coy NCC, Kohima indang Commanding Officer Col Daniel Lotzem-i iba sentong tenzuka jembiba mapang shilem shiba cadets tem dang tejangraba tulu nung shilem agitsü ayongzuka liasü.

Camp mapang cadet ajungai COVID-19 tashidak wara nungi jembua aliba yimyatam amshitsüla, ta pai ashi.

NCC Cadets tem nem lungjemer training agütsü aser lenisüba sempet renlokdahtsütsü nükjidong nung

CATC-38 ya agir. Iba training mapang yimya tajung süpaba, linük meimba, mapang shidak amshiba, secular outlook, tajangshiba balala indang tanila arudaksüba, saisapong jangraba aser linük asoshi bilema inyakba molungsentsü lidaktsütsü tesayuba agütsütsü.

Iba training nung parnok nem hadir balala amshiba, Drill, Map Reading, Military subject, Firing aser National Integration aser linük yangerba onük nung tesayuba balala agütsütsü.

Iba camp mapang cadet temi Swatch Bharat Abhiyan amala mapa tem inyaksü.

ASTD-i Dr SC Jamir tushia...

"Tanü ochi jembitsü arentaker masü tsübur. Asenoki ayawara indang jembir saka tanü Naga lima nung ayawara tulutibaji ochi agi anünger. Aortem tesangwa mezüng bener arurtem, tashi temetet mezüng bener arurtem lir" ta paisa ashi.

Linük tenzükba wadang nung mezüngbuba NNC president ji T Aliba Imti liasü, Statehood atema inyakba nung len anirji Dr Imkongliba Ao, mezüng Chief Minister P Shilu Ao aser mezüng Member of Parliament ji SC Jamir lir.

Aor ya mezüng-mezüng ta dang aru ashi tangar sülen maliasü, aji kechiba ta süra Ao kinji putepa aser angatettepa aliba yong yamaji litet, ta paisa metetdaksü.

"Tanü Ao senso tanishirtem dang ochishia liang ta ayimoktsütsüla. Tajung dang tajung aser majung dang majung ta ashitsüla. Ao kin mesotsüla. Aor o dang jembia alitsü asü joko inyaker chiyungtsü, pei mangji pei tetsüng agi ti-a noktaksü? O jembiba agi dangbo alima tejakleni

(TAPAK 1 NUNGI...)

maotsü. Aor ajaki pei yim, tzükong atema mebilemi Aor ajak atema bilema inyaksüla. Aor tajemrepba kin masü saka asenok tanü iba jenjang nungi shia arutsü atema mapang agitsü" ta Dr. SC Jamir-isa ayongzük.

"Ao kin nung anü tasen adokdaksünüra, mepet süshidaktsüdi aser Tsüngrem dang sarasadema aser tashi meshia pei tashir linük libaliro angazüker melenshia tejakleni odi" ta paisa ashi.

CM-i CIHSR nung Acute Care Hospital Block semzüksütsü

Dimapur, Yimpoksüi/Nov. 10 (TYO): Chief Minister, Neiphiu Rio-i Christian Institute of Health Science & Research, Dimapur nung Acute Care Hospital Block ka November 12, 2021 anepdang 9:00 ako nung semzüksütsü.

Iba sentong nung Dr. Sedevi

Angami menden asütsü aser Chief Secretary Nagaland, J Alam, IAS ajanga sentong lapoka jembitsü. Maneni iba sentong nung Deputy Chief Minister, Y. Patton aser Minister, Health & Family Welfare, Pangnyu Phom natia o jembitsü.

Naga Club pur lokti senden Nov. 13 nü amentsü

Kohima, Yimpoksüi/Nov. 10 (TYO): Naga Club indang küm nung khen amenba lokti senden ya November 13, 2021 nü AMK building conference hall, Kohima nung amentsü sentong lir.

Naga Club tir Ariyi Nienu-i sangdong ka ajanga ashiba agi, iba senden nung Lavagei, Jotsoma nung Naga Club Monolith commission asütsü, iba nüngshilong azüngtsü atema Nagi Clan ajanga ali tenlartem tenüng nung VCC Jotsoma, Rudolie Nagi-i jembitsü, Laudate Choir, Jotsoma Baptist Church ajanga temeja ken atentsü aser Niketu Iralu, Advisor NC ajanga tajungshi o jembitsü.

Maneni taoba mapang Naga Club indang caretaker, Khyomo Lotha ajanga Naga Club Souvenir sayatsü aser Naga Club tongti zülur aser kimen nungi report agütsütsü.

Ano iba sentong nung ketdangpur tasen shimtsü aser Naga Club tashi ita aotsü atema jembishinü alitsü.

Iba senden nung Sashirenla aser Gracy Newmai na menden alitsü, Rev. Kiyeto G. Sema, Sr. Pastor, SABCK ajanga Tsüngrem temoatsü jazüka sarasademtsü.

Naga Club tir Ariyi Nienu-i tir o jembitsü aser Rev. Dr. Vetso Koza, Pastor, CBCK ajanga Naga Club ketdangpur tasen moaja sarasademtsütsü.

Noklak District Task Force pur senden menogo



Dimapur, Yimpoksüi/Nov. 10 (TYO): Noklak District Task Force on COVID-19 pur senden ka November 10, 2021 nü Deputy Commissioner, Noklak indang Conference Hall nung mena liasü.

Iba senden nung Deputy Commissioner, Noklak, Hiazu Meru menden liasü aser pai district nung COVID-19 mozü agiba indang osang agütsü.

District nung COVID-19 mozü kanga ajema agiba atema sasaba pai lemsatop aser iba atema temsüa alir ajungai mozü agitsü ajungshia liasü.

Benjong-bentsü mapang nüburtemi COVID-19 tashidak

wara nungi jenbuttsü meratem agitsüla, ta Meru-i shia liasü. Paisa District Task Force züngsem ajunga dang alia oa nüburtem mozü agitsü asoshi inyaksü ayongzuka liasü.

Iba senden nung ki sema COVID-19 mozü agüja jajatsü, jila aser yimtsüng sasep nung awareness campaign ayongzuka agitsü, aser Sub-divisional aser village level task force on COVID-19 tanaben tenzükshitsü indanga jembia liasü.

District nung COVID-19 vaccination aser tendangba maparen tali inyaksü senden nung pangjema liasü.

Committee of Privileges pur senden ayonger

Dimapur, Yimpoksüi/Nov. 10 (TYO): Advisor aser Committee of Privileges, Nagaland Legislative Assembly indang Chairman, H. Tovihoto Ayemi-i iba Committee senden November 23, 2021 nü amentsü ayongzuka lir.

Iba senden ya Assembly

Secretariat indang Committee Room nung Anüngdang 11:00 ako nungi alitsü, ta sandong ka ajanga ashi.

Iba Committee nung züngsem ajunga iba senden nung medema arua adentsü mepishir, ta sangdong ajangasa ashi.

Ao Students' Union Tzudikong Town-i tenüngsang agütsür

Dimapur, Yimpoksüi/Nov. 10 (TYO): Miss Mokokchung 2021 tetoktepba nung Kongru Moasenla Imsong-i tematiba jenjang ngutetba asoshi Ao Students' Union Tzudikong Town ajanga konang tetushi tulu agütsür, ta Ao Students' Union

Tzudikong Town sangdong ka ajanga ashi.

Tarutsü anogotem nunga la ajanga iba ama nübur asoshi tenüng tajung konang bener arutsüsa ano Tsüngremi la moajangma, ta ASUTT sangdong ajangasa ashi.

Meghalaya CM Conrad-i 'Eastern West Khasi Hills' district lapoktsü



Meghalaya Chief Minister Conrad K. Sangma-i Bodbarnü 'Eastern West Khasi Hills' tasen lapoktsüba noksa nung angur.

Shillong, November 10, 2021 (Agencies): Meghalaya Chief Minister Conrad K. Sangma-i Bodbarnü 'Eastern West Khasi Hills' tasen lapoktsüogo.

Iba sentong nung Meghalaya Legislative Assembly Speaker Metbah Lyngdoh, cabinet minister aser MLA tem aden.

West Khasi Hills nungi district balaka tentetba nung Mairang aser Mawthadraishan C&RD block tem dena lir. Mairang ya civil sub-division tejentiba lir aser iba ya November 10, 1976 nü tentetba

liasü aser küm 45 sülen tanü district tasen ka kumogo.

'Eastern West Khasi Hills' indang headquarters ji Mairang asütsü.

District tasen kumtetba ajanga nübor tajungba yaritetsü, ta Chief Minister Conrad K. Sangma-i ashi.

"Nübor temi mapang talangka nungi aginüa aruba ama district tasen tentetogo. Ni opposition leader ka ama Mairang semdangdang nübor temi district tasen ka aginüba shia liasü" ta pai ashi.

"Khasi Hills mesüra Jaintia Hills mesüra Garo Hills nung

adenba agi masü saka ajak shisadangba sülen iba district tasen tenteter. Iba tesem nung terenlok mapa agi anünga lir aser iba jagi state nung 12 buba district tenteter" ta paisa metetdaksü.

MDA sorkari nübor temi tebilemstütem atema tongti süa inyaker. Onok ya public aser nübor temi dak ranglokba sorkar ka lir" ta Conrad-isa ashi.

"Chief Minister ka ama ni terenlok indang mapatong ka lapoktsüdang nisung karibo melabela olen jembir aser ni tejak repranga inyaker ta tai tongloksür" ta paisa ashi.

Police-i nisung tepseter ka dak injang khaloktsü

Dibrugarh, November 10, 2021 (Agencies): Tinsukia district kübok Margherita nung nisung kati arishi küm 10 tanur ka tepset aser pai Assam Police ket nungi jena aotsü merangba agi injang khaloktsü.

Police-i Bikram Das ta ser nisung ka apu saka pai jena aotsü merangba agi injang khaloktsü.

Das-i kinunger tsüngda mangatettep ka atema par kinunger Rahul Das tepsetba

nangzük ta police-i ashi.

Tanubosang ya anogo ka tejakdang nungi samar bushitep aser iba atema Margherita police station nung FIR benok.

Rahul'er tsüraburtemi pa samaba FIR benokba sülen bushisüngdanga arudang Bikram Das dak temolung meleme apu aser pa dang asüngdangya asü dang pai tepsetba nangzük.

"Bikram apuba sülen pai

nisung tepsetba tesemi anir ao saka pai idak nung jagi jena aotsü merang aser idangji police-i pa tetsüng nung injang khaloktsü" ta police ketdangsür kati ashi.

Iba sülen pa Margherita civil hospital-i anir ao aser idak nung jagi Assam Medical College and Hospital (AMCH), Dibrugarh-i anir ao.

"Pa AMCH nung anepaludar" ta Assam Police ketdangsür kati ashi.

Tripura nung NLFT (BM) tanishir ka temai adok



Agartala, November 10, 2021 (Agencies): Tripura nung ozüngi noktanga aliba telok NLFT (BM) nung tanishir ka tanü temai adokogo.

Agartala tezülen aliba Salbagan nung telungpuri Border Security Force (BSF)

matsüngdang temai adok.

NLFT (BM) tanishir ya Rana Bahadur Debbarma Roaja (Hemchang) ta jangjaogo.

Arishi küm 51 tain Rana Bahadur ya captain liasü aser 1995 küm NLFT (BM) züngsem aküm.

1995 nung NLFT züngsem akümba sülen nungi Rana Bahadur-i kidangi khen danga maru ta BSF ketdangsürtemi ashi.

October 18 nunga BSF matsüngdang NLFT (BM) züngsem Jaiba Kaloi (Litan Jamatia) temai adoka liasü.

Tripura civic election: Menden 112 nung BJP den tetokteper melii takok nguogo

Agartala, November 10, 2021 (Agencies): Tripura nung BJP-i civic bodies menden 334 nungi 112 nung tetokteper shinga melii takok nguogo.

Hombarnü Tripura civic polls nung tokteptsüpor nominations meyipa agitsüba tatembang anogo liasü aser party balala nungi candidate temi tenüng meyipa agi.

Hombarnü candidate 36-i tenüng meyipa agi. Parnokji

CPI-M nungi 15, Trinamool Congress (TMC) nungi 4, Congress nungi 8, AIFB nungi 2 aser independent candidate 7 liasü.

Tripura nung 2018 küm BJP sorkar akümba sülen tang mezüng atema civic bodies elections nung tokteper.

Agartala Municipal Corporation dena civic bodies 20 atema election November 25 nü agitsü.

Drugs khuret ya kiralongraba dang nungi tamajungtiba: Pema Khandu



Arunachal Pradesh chief minister Pema Khandu

Itanagar, November 10, 2021 (Agencies): Ozüngi noktanga aliba mozü achiba khuret ya kiralongraba dang nungia tamajungtiba ta Arunachal Pradesh chief minister Pema Khandu-i ashi.

Arunachal Pradesh police indang 49 buba Raising Day nung jembidang CM Khandu-i iba ya ashi.

"Asenok külemi longjemmer asen loktiliba nungi ozüngi noktanga aliba mozü achiba samatsüdi.

Arunachal Pradesh police-i mozü anema mapa tulu ka tenzüka inyaker.

State police-i tawa drug rackets aika makdokba atema tenüngsang agütsür ta Arunachal Pradesh chief minister-i ashi.

Rajkanya Baruah -i aniba gari agi atsüker ka asü



Guwahati, November 10, 2021 (Agencies): October 2, 2021 aonung Assam nung Rajkanya Baruah-i yi jemer gari agi nisungtem dak atsükdang yirur ka süogo.

Iba nisung ya Joseph Marak liasü aser Rajkanya Baruah-i aniba gari agi atsükdang pa tetsüng anaprong raksa aser temang kanga mejungi anepalua aru.

Joseph Marak ya Gauhati Medical College Hospital (GMCH) nung anepalua aru saka Bodbarnep asü.

October 2 aser October 3 aonung taoba Miss India finalist Rajkanya Baruah-i PWD (Public Works Department) nung mapa

inyaker nisung 9 dak gari agi atsük. Iba lendong ya Guwahati kübok GS Road nung atalok.

Iba mapang Rajkanya Baruah yi agi mesepa jemer liasü ta tai tonglokja lir.

Rajkanya ya Taj Vivanta, Guwahati nung birthday benjung ka nung denür kidangi aodang Down Town area nung aayangertem dak lai aniba gari jagi atsük.

Mezüngbo la nem okadaki bail temelaba agütsü saka Dispur Police-i la tanaben apu aser October 8 nungi tepuokdak yua lir.

Iba lendong nung nisung ka asüba ajanga iba ken o tuluba akümtsü akok.



TIR YIMYIM YIMOBILEM (EDITORIAL)

DIMAPUR YANGTEPNÜ, YIMPOKSÜ (NOVEMBER) 11, 2021

ULB alitsü nüngdaker

Urban Local Bodies tetezü pei yimti repringa ketdangsütsü asoshi nübortemi election agia shimtetba Municipal aser Town council-tem lir. Ibai yimtak yimtsüng nung putu menden mesüra village council kümteta government-i parnok nem pei yimtsüng nung nüngdakba terenlok mapatem inyaksü asoshi tashi aser senotsü agütsür inyakdaksüba amai town nunga telidakpurtemi parnoksa parnok alidak terenlok mapatem inyakdaksütsü asoshi tentetba yimten menden ka lir. Ajsüaka, Nagaland nung lateta akaba Municipal aser Town Council Act nung Naga nung sobaliba dak maketba inyakyim tasen kar aliba agi nübortemi mapa kuma moudaksü soita lir. Atangji, Nagaland nung Municipal aser Town Council Act latetba sülen Mokochung dak alaka Dimapur aser Kohima nungbo election agia Municipal Council office mesemtetba mapabo tenzüka inyakdangogo. Ajsüaka, Municipal aser Town Council züngsemtem rongnung noklang nung semerasem shilembo tetsür alitsüla ta asüba onük nübortemi magizükteti anema nokdakba ajanga tang tashi ULB election magiteti arur. Atangji, ULB alitsü atema latetba ozüngji asen sobaliba den kodang medemdangdir, tetsürtem nem yimten menden nung shilem balaka shiteta yutsüsbaji dang masü saka Municipal aser Town council kübok ali madak kibur akümbaren nunga inyakyim mesademtsüsa adoker. Kechiyong kodang tesem ka Municipal kübok aitdir, iba tesemji Cadastral akümer. Cadastral tetezü joko municipal kübok aitba ali kimong ajungaji government-i asadanga tezüluba nung zülüoka ayutsü aser ali kiburtem nem pei ali kimong madak kibur kümdaksüba tamaitü 'patta' agütsütsü aser iba melen alimelen agitsü. Iba sülenjibo asen li nung asüyonga asen mulungba agi Municipal nungi temelaba magii kiojena meyanglutsü, anungji asen li aser asen kimong süaka government meyong amato kümadoker. Ajsüaka, item ajakji asenok alidak yimti tipdema renloksü aser asenoka nüngdak ajak shitak ngua anisüngzüksü asoshi lir. Tangbo asenoki asen ali kimong nung asen yanglunütsü yanglur, iba jagi lenmanga mesadem kümdaksür aser ali den mesütep kiojen tulu aser talang yangluba agi lendong tulu ataloktsüa ana nung lir. Ano, municipal aser town council alitsü nüngdakbaji pei yimti aser pei kiyong anepalutsübaji telidakpurtemi repringa anepaluba tetka maka, ibayongji election ajanga kiyong (ward) shia nungi nisung shimteter anepaludaksür. Nagaland nung election agia ULB mekümtetba ajanga tangbo government ketdangsertem (administrators) rongnungi municipal mapa repringtsü asoshi nisung ka yoker. Ajsüaka, aiben iba nisungbaji iba municipal yimti nung telidakpur masü saka tanga nung alir ka arushia atar, anungji pa mesüra la asoshi municipal aser town tesemtemji tasen, anungji kong kechi inyaksüar memetetika mapang süidaksür. Ibaji dang masü, kasa sensosangersa asüyonga bendanger ka arua tenzüka dang nungibo telidak lisopur kati pei alidak pei yimti aser pei nübortem anepalubajisa tajungba asütsü. Item ajakji kodang asadanga bilemdangdir, center nungi senotsü angutsü aliba teyarijibo toktsür, Municipal aser town council mapa ya aiener mashi ka nem masü saka telidak purtemi repringa anepalutsübaji kanga rongdak nüngdak kümogo. Atangji, asen lima nung, tang ULB mekümtettetbaji alimelen saruba dak aketba nung ken o ka aser talisa tetsürtem nem menden kar shiteta yutsütsüba ozüng ya nübortemi magizüktetba ajanga lir. Ajsüaka, ULB ya nübortemi akümtsüla, anungji India küboksa süaka Nagaland-bo jenjang balaka nung kuma alinungji, ULB akümba yimya yaa balaka asütsüsa asenoki center den jembitettsüla. Atangji, election magii ULB nung züngsemtem shimtsü asoshi tang Nagaland government-i bilemer, aser aji yimten telok karibo aitsüogo, kechiyong aji lateta akaba ozüng anema aser ano shimba nungji, nisunger yimya asünungji, ozü party, ozü nisung aser ozü kinunger ta asüba jakla agi shimtsü, anungji alimabosa merenloksüa akok. Ajsüaka, election-a magitet aser teshima meshimtet ta asüba agi asenok kanga akoksadagi, anungji tendanga tetsürtem nema maongka agüja, küm anasemka asoshi danga wadang balala nungi teindang nisung shimteta ULB kümteta ao nunga jungla.

OLEMSABANG

Ao Oshi Mesamai Takar Kümünür

~ P. Renthly Jamir

Tang asen Aortemi oshi tsütsü kanga temulung agüja züluba/jembiba angur/angashir. Anungji maneni lephia oshilu kasa zülur. Asen oshi B.A, M.A nung amtsü kaket zülutsü ajungshir saka tsüraburi jembiba, ken atenba o teratetem bendener mali. Asenok ya tejembir tasa teinyaker mali. Ao oshi takar tabo ajaki jembir saka kechiba takar ta ajar aji terasa shiangaia memetet. Anungji Ao oshi takar ta ajaba kuli kar yangi zülur. Sensaker tetsü kecha maka saka takar ta ajabaji ajak tabensa akaba agi takar ta ajar. Tsürabur mapang nung ken ka o ka ta jembia aru. Anungji aiür kongro, sangpang asangur dang yamai tenüng balala jaa aruba ojang ana agiteta kar zülur. Aiür asangur nungja yamala ano aika lir. Kar dang zülur.

AIÜR NÜNGJA :

1. AKONGNARO : Naro tapu aika rongnung Akongnaro ya telemsa tapu aika tobur tajung tasa lir. Anungji aiür tajung nem Akongnaro ta agütsü.
2. BANGMEREMLA : Ozütema tebang nung temerem aliba ozüsa tobur tajungba. Aiür tobur tajung dang Bangmeremla ta ajar.
3. CHUBAJAREM : Aori aiür tobur tajung ta asüba melena Chubajarem ta jembir. Iba ya süngjang sentsü tajung aser tobur tajung rongnung ka lir.
4. LUNGMAWATSÜ : Tenem ozü tetsü onsara tobur ajung, tanga ozübo tetsü o tebong na khenyongi balala teimba , tebongsa tajungba. Tenem ozübo kecha tepila mali oda tenük nung dang ka temerem aser ka temesung ta teploka lir.
5. MECHIPEN : Iba ya naro tobur tajung ka lir. Aser aiür nem iba nungja agütsür. Item nungja aiür ajak nem agütsür masü.
6. MEYONGPEN : Iba naro ya warowaror tobur onsara ajung, arem ajak azüa apunger. Anungji aiür tajung nungja Meyongpen agütsür.
7. NOKPUBANGSEN : Naro tobur tajung, teronem tajung aiür nungja ya lir.
8. SÜNGTITSÜBEN/SÜNGTIKONGRO : Aiür dang Süngtitsüben ta ajar aser ano ken aika nung Süngtikongro ta atener.
9. YIMTINARO : Yimdong nung aiür tajung ka jajadang yimdonga azüazüa akümer. Anungji aiür dang Yimtinaro ajar.
10. YUANEPLA : Ola osü tanep tangar puatsüsa tetemsü aiür tajung. Ano yamala aiür nungja aika lir. Aser itemi tsürabur ken balala tapu aika nung angutsü.

Aiür dang ajaba ama asangur nungja aika lir, item rongnung kar.

ASANGUR NÜNGJA :

1. LUNGMAWABONG : Tenem ozü tebong ta asangur dang ajar.
2. KISOANBONG : Kidang metsütetba antebong, asangur nungja.
3. LOYANGBONG : Yangyang rongnung Loyang yasa ola tatsungba, arem ajak metangtoka asar, anungji asangur dang Loyangbong ta ajar.
4. MOLUJEMBONG : Ozü tobur tajung tokuka, iba nungja asangur dang ajar.
5. MAIBANGNOK : Nok tobur tajung Maibang lima yangluba.
6. SÜNGYU : Ongu ozü ama tobur tajung ken aika nung asangur melen süngyu , süngyu ta atener. Asangur ajak nembo itemi magütsür.
7. SANGWANANGBONG : An tebongi sangwatsü nung akonger, anungji iba nungja asangur dang ajar.
8. UNGERLONGYANGBONG : Ungerloyangbong ta ano Ungersangbang ta ajar.
9. WASANGBONG : Asangur onsara teyakyak, tepera jangratemtsüka.
10. YARANGBONG : Rügen temerem tobur tajung arem ajak yamoka adoker.

Ano yamala asangur dang ajaba aika lir saka Ao oshi takar ta jangjatsü tatishitsü kar züluba dang kechiyong shisa takasang Solomon-ia aiür asangur tobur tajung dang Posü ama ta, shio tsüla ta, mesü lamem ta, guduru ta, Jaremno ta amshia lir, saka Aor nungjabo madoksa. Ano Shakespeare otsü aser John Keats, P. B. Shelley, W. Wordsworth nung sangro nunga yamala nungja takar ama yabo zülua mangur. Tetsür tebur bendanga o tembanga TIR- Ao oshi yamai tetsür tebur bendanga takar sünung o ka agi ana asem nung amshir. Tamalen Tir ya tebur nungja ta shiogo kechiyong Aor sobaliba nung tetsür arürshir maor. Anungji tetsürtem Tir melena Tenir ta amshitsüla. Lipok nungi meimchiri alu züsena taküm lia aru. Alu makai nisung taküm alitsü makok, chubajia alu agiang mesür (Sayu 5:9). Aor akhi mapang nungi alu wadang nung lokti tulu tila ajak nung tetsür tain kati ten anitsü, teinyaker nübu kwi aji apir ten anilai wadangji ayimzüksü tulua tilaa la mulung. Aor alu wadang tebur ten manir telok tesen züngamungji ajak nung tenitsü tetsür shilem. Anungji lokti tentet tetsüri aniba ajak tanishilaji TENIR ta ajatsü tetemsü. Aser tebur tenishisang dang TIR ta ajatsüla. Ano tebur telok asüyonga tanur (Küm nung tanur) telokbo Tir ta mamshitsüla. Takar tulu ta asüba yabo küm tasazük mali saka Tir yabo tebur nisung tain, nokinketer dangang ajar. AO SENDEN TIR, Tzükong Tir, ta ajatsüla. Ao oshi takar akümtsü asalentong shisa bendena ajaki pei bilemba lemsateptsü ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Clark Theological College nung Doctoral Programme tenzükogo



November 10, 2021 nü Clark Theological College (CTC) nung Doctorate of Theology (DTh) Programme tenzükba sentong nung Doctoral Committee züngsemtem: Dr. K. Dhanbir Rai, Dean of PG Studies, Prof. Imsutoshi Jamir, Dean of Doctoral Studies, Dr. A. Temjen Jamir, Principal, Dr. Akala Ao, HOD, Christian Theology Dr. A. Tali Ao, Academic Dean nungert tangokba noksa nung angur.

Aolichen/Mokokchung, November 10 (TYO): November 10, 2021 nü Clark Theological College (CTC) nung Doctorate of Theology (DTh) Programme tenzükba sentong agiogo; iba sentong ya CTC pur 49buba Thanksgiving Day anogomong den kasa denjia agi. CTC Principal, Rev. Dr. A. Temjen Jamir-i Doctoral Programme semzükja jembidang pai, "Research ya temaba shisaliok balala tajemdak lir," ta ashi. Paisa, CTC nung doctoral research programme tenzükba ajanga tetezü tali akettsü aser theological shisaliok den theology azüngertem atema scholarship angutsü, ta ashi. Kasa sentong nungsa

Nagaland Legislative Assembly Speaker, Sharingain Longkumer-i agütsüba sempet balala CTC Retired Faculty aser Staff züngsemtem nem agütsü. Iba college nung taoba mapang inyaktertem aser staff tem nem sempet agütsüba mapang CTC purtem tenüng nung Prof. Imsutoshi Jamir-i S. Longkumer aser sempet agizüker ajak dang pelaba lemsatep. Paisa, iba ya atangji Kibuba sentong ka liasü, kechiyong iba ya shingai mapitet mesüra imlaa maliasü, ta ashi. Tsüngremi pa aser par kibong maneni moatsütsü atema CTC purtemi sarasademsür, ta pai ashi. Iba sentong nung CTC Chaplain, Dr. Nungshi Tzüdir-i Tsüngrem O jembi.

CTC purtemi sangküm küm 50 abensaba Jubilee amongtsü renemba aser yongyaba mapang nung Levi 25: 8-12 nung ajemdaker Dr. Nungshi-i, Jubilee ya nüchi anguba, melenshiba aser tasen kümshiba mapang ka lir, ta ashi. Paisa, Jubilee ya tesüiba mapangtem bilemtetba dang masü saka tarutsü atema nükjidorong yur ranglokba aser mangdang tasen ayuba mapang ka lir, ta ashi. Sentong nung Dr. Boholi Sema-i Lai zünga sarasadem, Rev. Dr. A. Tali Ao-i tenüngsang agüja sarasadem aser Dr. Y. Tongchingsangla Chang-i sentong tembanga sarasadem. Iba sentong ya Rev. Dr. K. Dhanbir Rai leniba nung agia liasü.

California nung pastor ka khasetba ken o nung ano shinga mapu

November 10, 2021: October 24, 2021 nü Compton, California nung aliba Upper Room Christian Church Tenla kima pastor ka khasetba sülen anogo 10 dak tali jungogo, ajisüaka iba tatalokba dak sendakba nung tang tashi shinga mapu, ta osang ka ajanga metetdaksü. October 24 nü nisung kari pastor, Rev. Reginald Moore dak teku nung injang khaloktsüba sülen lenmang nung pa ket nung Laishiba ka amer pa sür lia angu. Pa arrshi küm 67 liasü. Amongnü pai Bible study agiba sülen senshiba mapang anüngdang pa khaset. Osangbenertem senden ka nung par kibong aser region nung lenirtemi aibener dang pei sasa tai nangzükang aser temenen mapa tebenshi, ta mepishia metetdaksü. Bible study agiba sülen pa kidangi aotsü atema pa meyong gari anena alidaki aoba mapang nung nisung kari pa lenmang nung khasetba sülen anogo aika süir saka tang tashi aibelener mapu, mesüra melung melemini shinga pua mali. Par kibong züngsemtemi, aibelensangji mangu tashi parnok melungjang



Pastor Rev. Reginald Moore

meimlai liasü. Pa Sunday school agiba sülen lenmang nung tejajadak mapang nung pa dak iba ya atalok," ta ashi. Iba ya matalokdang anogo ishika jakdang par adianu ka aser kinünger tetsür ka süa liasü. LA County Sheriff Department homicide Bureau-i, bushisüngdang 10-i iba tatalokba kulitem bendendar, ajisüaka tang tashi nung ano shinga mapu, ta metetdaksü. October 25 nü kasa tesem nungsa pastor nem akhüm agütsüba sentong ka agiogo. Moore ya Upper Room Christian Church nung pastor teinyakdak liasü. Pa teka külen ajok aser külen Laishiba, ta amer lia khaset. Pastor khasetba dak sendakba ken o nung ketdangsertemi aut sentsü mesüra tammang sentsü sedan gari ka bushidar. Sheriff Department Homicide Bureau-i iba dak sendakba osang metetertem dang phone number 323-890-5500 ajanga metetdaksütsü, mesüra "Crime Stoppers" dangi 800-222-TIPS (8477) nung call asütsü mesüra lacrimestoppers.org ajanga osang metetdaksütsü mepishiogo.

ANO GO ABEN TSÜNGREM DEN

Ateta atsüngba Tsüngrem O

Kechiaser Tsüngrem O taküm aser teinyak aser anatsü nok ajak dang nungi techiraba; aser taküm o tenüngla ya ajak ateta tsünga bendangtet aser temulung tebilemba aser tasa asaba yakta metetba. Ibri 4:12.

Tsüngrem Oi na mesüngzüketti kümdaksür asü? Kodang nai Laishiba azünger, nai azüngba Lai tekong jagi na mesüngjemi kümdaksür asü? Kodang nai sermon angadir, Lai jagi ne den jembir ama nai bilemer asü? Nai Tsüngrem Oji taküm aser nai bilemba ajak bendanger ta nai metetta arur.

Kodang Tsüngrem Oi ne den jembir ibai teti nükjitorong ka asoshi jembir. Tsüngremi ne mulung aser na Khrista den akanga sendaka alitsü asoshi na kechi nüngdaker aji metet. Nai temenen indang jembiba tebilemtsü kar lira, ne dangi aruba Oji temeli ajanga arur. Nai tatok agütsütsü merangya lira Tsüngremer jenjang nung tatok agütsütsü o jagi sayutsü. Asükümji ne taküm nung kamdong takang ka lir. Tsüngrem ne den ajemtsü atema jembitsü. Kechi temenen indangsa jembidir jembiang, iba mapa ajak na Tsüngrem ajanga nokdang.

Ne tamang nung mesüngjemetetba paidoktsü lenmang kaji Tsüngremi ne den jembiba mangai toktsübaji lir. Nai Laishibaji mezüangi toktsütsü akok aser kong iba o sayur iba nung jagi pilaa alitsü akok. Shirnoki ibai soter ta nai metet, nai parnokji sentoktsü akok. Tajungtiba telangzübaji ken zülur sarasademji lir: "O Tsüngrem, kü dak bushiang, aser kü mulungjang metetangma: Ni tendangang, aser kü tebilemba metetangma" (T.Ken 139:23). Maneni Tsüngrem O jagi ne mulungjang shidokjang aser temenen kar ta lira bushitettang (Ef. 5:26). Teti ne taküm aser Tsüngrem O ajanga ne dang kechi ashir ana tsüngdaji sendaktepa ali bilemang. Tsüngrem O-i ne tebilemba aser ne mulungjang metetter ta metetta Tsüngrem O ajakji süoki ia agitsü yimya küma alitsü merangang.

Nashville nung Pastor kati par santem kümzük

November 10, 2021: Taoba pa tebilemba ajak inyakteter Amongnü (November 7) lila," ta ashi. Nashville, Tennessee nung Iba mapang nungji pastor-i aliba Arogo ka nung tekülem kimai ayazüka alur ama sayua sentong tagidak mapang tesülen aliba kishileni ao aser prangpong amer ka Tenla ki ilonga Baganda tsütsüleni oa pa telungi aita santem khasettsü ali nung nüngket. Iba mapang atemshiba mapang pastor-i par nungji tangartema arua pa den santem kümzük. yarisema liasü. Prangpong amer ka Tenla ki Baganda ya iba Arogo nungji telulungi aitsangji arrshi küm züngsem ka masü, saka 26, Dezire Baganda lir ta tamalena pa iba Tenla kidangi jangjaogo. Nashville Light arua tekülem sentong nung Mission Pentecostal Arogo dena liasü. Tenla kidang pa menden Iba tatalokba sülen Arogo tejaklen mena liasü. züngsemtemi parnok kümzükba atema pastor dang pelaba atema pastor dang pelaba lemsatep. Pastor-i santem kümzükba atema Tsüngrem ang sentsüngwangshidaksür, ta ashi. Tekülem sentong tenzükba aser pa teka nung prangpong kümzükba atema Tsüngrem ang ayipshia lokti dang nokdakang, ta tuyua liasü. Osangbener den jembidang "Tsüngremi Pa dak tashi tulu Pastor, Ezekiel Ndikumana-i, aliba kuli sayunüa liasü, aser "Nisung khasettsü pa onoka tamang akanga liasü," ta pastor-i ashi. Iba mapang nungji tangartema arua pa den yarisema liasü. Baganda ya iba Arogo nungji züngsem ka masü, saka tamalena pa iba Tenla kidangi arua tekülem sentong nung dena liasü. Iba tatalokba sülen Arogo züngsemtemi parnok kümzükba atema pastor dang pelaba lemsatep. Pastor-i santem kümzükba atema Tsüngrem ang sentsüngwangshidaksür, ta ashi. Osangbener den jembidang "Tsüngremi Pa dak tashi tulu Pastor, Ezekiel Ndikumana-i, aliba kuli sayunüa liasü, aser "Nisung khasettsü pa onoka tamang akanga liasü," ta pastor-i ashi. Hombar tashi nung Baganda sülen shinga maliasü, anungji pai anema ken o aika benokogo.



November 10, 2021 nü New Delhi nung Ato kilonser, Narendra Modi-i linük tenet-Kazakhstan, Kyrgyzstan, Tajikistan, Turkmenistan, Uzbekistan, Iran aser Russia nungi National Security Advisors (NSA) den senden amendang tangokba noksa nung angur.

Linük tenet nungi NSAs-i Afghanistan atema bangzüng ka renem

New Delhi, November 10 (Agencies): New Delhi nung National security advisors (NSAs) senden amenba sülen 'Delhi Declaration on Afghanistan' sangdongogo; iba bangzüng ajanga Afghanistan nung Taliban sorkar dang sorkar nung ajak dendaktsütsü aser tetsürtem, tanurtem aser minorities temeden kümzüksü ayongzüka lir.

Central Asia nung aliba linüktem- Kazakhstan, Kyrgyzstan, Tajikistan, Turkmenistan, Uzbekistan, Iran aser Russia nungi NSA tem iba senden nung aden.

Declaration nungji yamai shia lir, "Afghanistan nung ajak dendaktsüba sorkar ka tentettsüla, koba ajanga Afghanistan nung nüburtem taginüba ajak ataloktsü aser loktiliba balala ajak nungi züngsemtem adentsü."

"Linük takok ngua asentenshitsu atema administrative aser yimtenren

inyakyim ajak nung lokti ajak nungi züngsemtem züngoktsüji kanga tongtibang," ta declaration nung shia lir.

NSA temisa kiralongra mapatem ajak aitsür aser kiralongra dak sendakba mapatem anema raratsü bangjemer, ta Delhi Declaration on Afghanistan nung shia lir.

Taliban teloki Afghanistan agiba sülen sorkar ka sangdonga liasü, saka sorkar nungi Taliban telok nungi timtiba lir aser Hazaras ama minorities nungi züngsemtem densema mali. Afghanistan sorkar nungi tetsürtem nungi shinga züngsema mali aser cabinet züngsem 30 nungjagi 17 bo United Nations-i 'kiralongrar' ta sangdonga aliba nisungtem lir.

Linük tenet jagi külem sangdong ka ajanga, Afghanistan liji kiralongrartem jenokdaktsütsü, training agitsü, asalentong yanglutsü aser kiralongratsü atema khenyongi mamshidaktsütsüla, ta

metetdaktsü.

Iba senden nung adener linüktemisa region nung kiralongra, separatism aser temesepba mozü shibelenba anema amalitepa inyaksü bangjemogo.

Talisa Tajikistan aser Uzbekistan ama Afghanistan den kidanger linüktemi par linük nunga tensa raksatsüa akok ta shisabulur.

Senden nungsa Afghanistan nung nüburtem nem teyari balala agütsütsü atema o lemtepa liasü. Asükwa mongpu tenzükogo, aser Afghanistan nung Taliban sorkari nüburtem taginüba mataloktsü aser nisung aika chiyungtsü agi anünger, anungji alima linüktemi iba linük nung nüburtem nem teyari balala agütsütsüa akümtsü.

India-i Pakistan dang par linük ajanga süia Afghanistan nem teyari agütsütsü asüngdangogo, ajisüaka tang tashi Pakistan-i telangzüba magütsür.

Minister Mishra'er jabaso indang rifle nungi injang akhaba jangjaogo

New Delhi, November 10 (Agencies): Uttar Pradesh kübok Lakhimpur Kheri nung aluyimertem densema nisung ti asüba ken o dak sendakba ken o forensic test report ajanga Union minister Ajay Mishra'er jabaso, Ashish Mishra aser tangartem indang pistol aser prangpong nungi injang khadokba jangjaogo, ta osang ka ajanga metetdaktsü.

indang ballistic test agitsü atema FSL dangi yokogo aser tanünga prangpong asem nungi injang khadokbabo jangjaogo," ta ketdangser kati metetdaktsü.

FSL report dak sendakba nung tang tashi nungbo iba ken o bushisüngdangba telok-special investigation team (SIT)-i sangdong kecha magütsü.

Lakhimpur Kheri nung rara adokba sülen aluyimertemi, minister'er jabaso Ashish Mishra-i injang khaloktsüogo, ta tai tonglokja liasü.

Ashish Mishra, Das aser Kale nunger apuba sülen SIT-i parnok ket nungi license aliba prangpongtem- rifle ka, pistol ka, revolver ka aser repeater gun ka apu aser forensic test agitsü atema October 15 nü FSL dangi yoka liasü.

Forensic Science Laboratory (FSL) report ajanga item pistol nungi injang khadokba metetdaktsü, ajisüaka Lakhimpur nung raraba anogo nung khadokba asü tanga anogo ka nung khadokar mejangja.

First Information Report (FIR) nungji Jagjit Singh-i yamai shia lir, Lakhimpur nung tatalokba ya Union Minister, Mishra aser par jabaso nati jelia asalentong yanglur inyakba lir.

Lakhimpur nung rara atalokba sülen Ashish Mishra indang prangpong, taoba mapang Union Minister Akhilesh Das'er kinünger Ankit Das indang pistol aser Das indang bodyguard Lateef Kale indang prangpong pua liasü. Iba dak alia Das den yaritepsang, Satya Prakash indang prangpong report bo tang tashi mangu.

October 3 nü aluyimertem longkak aitba sülen senshiba mapang nikongdang 3:00 ako meta Ashish Mishra den nisung 15 shi gari asem nung arua injang khaloktsü aser Ashish Mishra mena aliba Mahindra Thar gari jagi aluyimertem dak tsükoktsü, ta FIR nung shia lir.

"Prangpong pezübuba

khasset, ta FIR nungsa shia lir.



Kozhikode, November 10, 2021: LPG Gas cylinder jenjang kanga atuba anema Bodhbarnü Kozhikode nung Kerala State Karshaka Thozhilali Union (KSKTU) nung züngsemtemi sorkar anema longkak aitba noksa nung angur. Taoba hopta nungang LPG cylinder (seret 19) nung sen 266 tali tuogo.

Centre-i sensaker anema inyakbamapatongtem sangdongtsü: Congress

New Delhi, Yimpoksu/ November 10 (Agencies): Congress Party-i linük tesem ajaklen 'Jan Jagran Abhiyan' ta ser awareness sentong ka ayongzüka November 14 nungi November 29 tashi nung agitsü aser Centre sorkari sensakerterem anema mapatong balala benokba onoki sangdongtsü, ta party-i metetdaktsü.

Bodhbarnü osangbenertem den jembidang Congress general secretary, KC

Venugopal-i, "Ato kilonser, Narendra Modi-i aniba sorkar mapatong balala ajanga linük nung sensakerterem kanga timtemer. Tesüiba küm ana tsüngda petrol, diesel aser tachila totzü nung jenjang kanga atuba asenoki metetogo. Sonia Gandhi aser Rahul Gandhi na leniba nung Congress party-i iba sorkar anema raradar," ta metetdaktsü.

"Onoki linük tesem ajungalen longkak aiter. Sorkari sensakerterem anema mapatong

balala benokba metetdaktsütsü atema onoki committee ka tentetogo aser asalentong yangluogo. Congress Working Committee (CWC)-i melunga iba sentong agitsü agizükogo," ta pai ashi.

Venugopal-isa, "Party nung inyakertemi lokti senden ayongzüka agitsü aser linük nung totzü jenjang tali atuba den BJP-i junga yimsü masüba ajanga timtemba nüburtem tenüng nung onoki ola adoktsü," ta metetdaktsü.

Nükjidong mesangdongra NGOs nem foreign fund magütsütsü: SC

New Delhi, November 10 (Agencies): Supreme Court-i, tenla agütsürtemi senotsü agütsüba nükjidong mesangdong nungbo melungtet teloktem (NGOs) nem bendanglen nungi aruba senotsü teyari magütsütsüla, ta metetdaktsü.

Centre sorkari Foreign Contribution Regulation Act (FCRA) nung iba dak sendakba ozüng shia mali, ta Supreme Court-isa metetdaktsü.

Justices- A M Khanwilkar, Dinesh Maheshwari aser C T Ravikumar nungeri akümba bench-i, iba Act kübok Arrla 8 ajanga senotsü teyari agütsüba nükjidong sangdongtsü atema shia lir, anungji iba dak sendakba nung Centre-i telangzüba agütsütsüla, ta ashi.

Iba Arrla nung ajemdaker

SC-i, senotsü agütsüba nükjidongji sangdongtsüla, iba sülenji ang bendanglen nungi senotsü yoktsü melatsüla, ta ashi.

Sorkar tenüng nung jembir Solicitor General, Tushar Mehta-i, melungtet telok balalai loktiliba atema mesüra yimsü dak sendakba maparen balala atema register süa aliba ama senotsü amshitsü akok, ta ashi saka SC-i, melungtet telok balalai maparen balala inyaksü atema register asür saka kechi mapa inyaksü atema senotsü transfer südir iba mapaji dang inyaksü atema senji amshitsüla, ta ashi.

Melungtet teloktem jagi maparen balala inyaksü atema account balala amshitsüla, ta SC-i ashi.

Sorkar tenüng nung jembir Solicitor General, Tushar Mehta-i, melungtet telok balalai loktiliba atema mesüra yimsü dak sendakba maparen balala atema register süa aliba ama senotsü amshitsü akok, ta ashi saka SC-i, melungtet telok balalai maparen balala inyaksü atema register asür saka kechi mapa inyaksü atema senotsü transfer südir iba mapaji dang inyaksü atema senji amshitsüla, ta ashi.

Melungtet teloktem jagi maparen balala inyaksü atema account balala amshitsüla, ta SC-i ashi.



November 10, 2021 nü Rashtrapati Bhavan, New Delhi nung 'Honorary Rank of General of the Indian Army on Sharma' Investiture sentong nung linük Tir, Ram Nath Kovind, tatong Tir, M Venkaiah Naidu, Defence Minister Rajnath Singh, Chief of the Defence Staff General Bipin Rawat, Chief of the Army Staff General MM Naravane, Chief of the Air Staff Air Chief Marshal VR Chaudhari aser Chief of the Army Staff of Nepali Army General, Prabhu Ram Sharma nunger tangokba noksa nung angur.



Taoba United States Tir, Barack Obama aser United States Special Presidential Envoy for Climate, John Kerry nati Glasgow, Scotland nung COP26 U.N. Climate Summit nung adener US delegation tem pela agizükba noksa nung angur.

Anogoshi Afghan nunger 4,000-5,000 Iran-i aiter

Tehran, Yimpoksüi/Nov. 10 (Agencies): August ita Taliban-i Kabul rakzükba sülen anogoshi Afghan nunger 4,000-5,000 shi Iran-i aitogo aser ano tang asükwa mapang meyrirjang aika arutsü imlar, ta Norwegian Refugee Council (NRC) ajanga Bodhbarnü ashi.

Taliban-i takok anguba sülen Afghan nunger 300,000 shi arütsü alema ogo aser Iran nem linük balalai teyari tali agütsütsüla, kong rongsenketzüng tsütsü timtem nung lir, ta teyari agütsüba telok yagi ashi.

"Linük balala nungi teyari tila agütsüba nungi Iran-i Afghan nunger aika magizüktetsü," ta NRC Secretary-General Jan Egeland-i ashi.

"Iran aser Afghanistan ama kidanger linüktem nem asükwa metenzükdang arsanga teyari agütsütsü nungdaker."

US sepaitem Afghanistan yutsür aoba mapang alima aoksaja Taliban-i takok anguba ajanga taoba mapang anüolen linükemi nungitba sorkar den sendaktepa aliba ketdangsurtem aser Afghan nunger tepetzük jenjang nung alirtem linük yutsür ainshitsü ayameso.

Ajungbena linük balala nungi teyari agütsüba anenba aser bendanglen Afghan central bank indang rongsen soita ayuba ajanga linük ya rongsenketzüng tamajungtiba jenjangi ai, aser 2015 küm Syria nungi nüburtem jena aoba ama refugee timtem ajurutsü tsübua

liasü.

Afghan nunger million pungo shi danga linük nung prokshia aliba ya shilem 90 shi Iran aser Pakistan nung lir, ajisüaka ajakjibo refugee ama mezüngshir.

"Tesüiba küm 40 tsüngta Afghan nunger million aika aniokba atema Iran nem tenüngsang agütsür. Saka tangbo alimai mera agia Afghanistan kidanger nem teyari agütsütsüla," ta Egeland-i ashi.

Afghanistan nütsüng yongsük million 39 aliba nungi million 22.8 shi chiyongtsü agi anünga lir, ta UN agencies ajanga ashir. Ita ana tejakdang Afghanistan nung nisung million 14 chiyongtsü agi anünga liasü.

Taoba Bangladesh chief justice küm 11 tepuokdak ayutsü

Dhaka, Yimpoksüi/Nov. 10 (Agencies): Ochimashi ken o ka atema Bangladesh indang taoba chief justice küm 11 tepuokdak ayutsü pa malidang obendang agütsür, aser opposition telok aser pa bukumertemi iba ya yimtenren tsütsü nungi inyaker lir, ta ashir.

Arishi küm 70 tain Surendra Kumar Sinha ya Supreme Court nung tekolakba inyakdang 2017 küm parliament-i obendangtem mapa nungi manentsütetsü, ta obendang agütsür, koba okatsürtemi pelashishia agizüka liasü.

Sinha-i 2017 küm Bangladesh yutsü aser iba obendang sülen pa menden yutsütsü ajungshia liasü, ta ashi. Pa North America nung alir, kong pai asylum bushia liasü.

Pa linük yutsür aoba ajanga linük nung obendangba tsütsü takoksa tulu ajuru, aser sorkari Sinha arishi, ta campaigner temi ashi.

"Pa dang sorkari jashiba temetet dang aser pai inyakteta yutsüba samatsütsü temolungtetba liasü," ta Dhaka University nung law professor Asif Nazrul-i osangbener dang ashi.

Nija indang bank ka nung ketdangsurtem den külemi Sinha-i sen \$471,000 tim

masüba nung amshi, ta linük yimtiba, Dhaka nung aliba court kati putet.

Iba ken o nung nisung ter talila densema lir, item rongnung nisung ti aitsüogo aser parnok nem temerenshi balala agüja lir, ta osang ajanga ashir.

Dhaka nung aliba Special Judge's Court indang Judge Shaikh Nazmul Alam-i Mongulbarnü obendang agütsüba mapang ozüng alema senotsü amshiba atema tepuokdak küm tenet ayutsü aser tamang makatetsüsa mapa inyakba atema küm pezü ayutsü latetsü, ta prosecutor Khurshid Alam Khan ajanga ashi.

"Iba obendang ya ajanga linük nung ozüng dang temaba shinga mali ta sayur. Aibelen mapa inyaktertem okadaki anir arutsü," ta pai ashi.

Muslim nunger timba sür nütsüng yongsük million 169 aliba linük, Bangladesh nung Hindu nunge chief justice ji Sinha ya mezüngbuba liasü.

Pai mapang tatsüka lir 'A Broken Dream: Rule of Law, Human Rights and Democracy' kaket zülu aser yangji pa mapa nungi anentsüsa akum aser sepaitemi amokmerenba ajanga linük yutsür jena aotsüsa akum, ta shia lir.

Poland-i refugee tem apu, Belarus arütsülen sepai tali yoksem

Warsaw, Yimpoksüi/Nov. 10 (Agencies): Belarus nungi migrant aser refugee tem Poland-i aitsü meranger noklang aika apu aser arütsü tashi itdaksütsü atema sepai talila 3,000 yoksema lir.

Polish Defence Minister Mariusz Blaszczak-i broadcaster PR1 dang Bodhbarnü ashiba agi, yasüng süngjema mesüyi, kechiaser nisung aikati Polish arütsü alema aittsü merang.

Nisung kari kotarang aser danga osettem amshia yinzü mesentepa yanglua aliba atsü rakpoka aittsü merang saka Polish security forces temi meindok.

Belarus-Poland arütsülen temokong arema nisung aika anogo ishika tsüngta European Union linüktemi aitsü teimla nung adenshia liasü.

Mongulbarnü nikongdang nisung 200 shi arua arütsü rakpoka aitsü merang aser ano ayatirm nung nisung 60 shi arua meranga liasü, ta Polish radio station RMF ajanga ashi.

Arütsü alemtsü merangertem ajunga apu aser yangji Polish sepaitem adenshia aliba ya 12,000 nungi 15,000 kumogo, ta Blaszczak-i ashi.

Arütsü anasa nisung 4,000 shi camp yanglur lir, aser item ya migrant aser refugee tem lir, aser parnok karbo anasa aliba

arem nung lir.

Item migrant aser refugee tem ya timba Middle East, Afghanistan aser Africa nungi lir, aser parnok ya taoba küm mangatetep aliba election sülen sorkar anemer tem Tir Alexander Lukashenko-i pua merenshiba atema anüolen linüktemi Minsk nem tenokdangba agütsüba mangyanga arütsü alema aotsü ajungshir, ta Poland aser EU linüktemi Belarus aittsür.

Timtem tali adokba atema EU-i tenokdangba tali agütsütsü asadanga mapang lir, aser yangji Belarusian foreign minister densema nisung aser tentet 30 shi densema lir, ta EU diplomats temi Mongulbarnü ashi.

Arütsü nung Lukashenko-i mapa tamajung inyakba telok indang yimya amshir, ta EU-i aija liasü, kong nisung tenet süogo aser kanga temokong den chiyongtsü aser mozü peria maliba ajanga timtem tali ajurutsü, ta human rights telok temi ashir.

Germany indang acting Foreign Minister Heiko Maas-i Bodhbarnü sangdong ka nung, Belarus arütsülen tangokba noksatem ngua temolung shiranger, ta ashi.

"Lukashenko-i refugee tem pa tashi amshia asayaba nung amshir... Saka European Union yoka mechitetsü," ta pai ashi.

Minsk ya Russia-i nungiter, aser parnoki migrant timtem ajurua aliba ya parnoki yangluba ka masü ta ashir aser arütsü nung nüburtem taolen mali adenshia aliba atema European linük aser United States tenüng asener.

Migrant aser refugee tem ozüng alema Warsaw-i meyipa yoker, ta Bodhbarnü Belarusian border guard service ajanga tai tonglokja liasü.

Külen Belarus indang foreign minister-ibo Poland den arütsü nung rongrong adoktsü asoshi EU-i ajungmeso, ta aitsü aser iba timtem asoshi Russia den lungjemer telangzüba agütsütsü bushir, ta ashi.

"Migrant timtem ya EU aser Belarus den arütsü aliba linüktemi ajungmesoba lir," ta

Vladimir Makei-i Moscow semdangba mapang shia liasü.

Poland-Belarus arütsü nung timtem adoka aliba ya Kremlin-i EU tenüng asener aser parnoki humanitarian value wazüka meyetet aser arütsü shibanga Belarus lensetsü meranger, ta ashi.

Iba tensa asoshi Polish Ato Kiloner Mateusz Morawiecki-i Moscow tenüng asenba ya magizükteter, ta Kremlin odongtar Dmitry Peskov-i Bodhbarnü ashi.

Iba tensa ya Russia Tir Vladimir Putin mapa lir, ta Morawiecki-i Mongulbarnü aitsü, aser iba ya ajanga züngsem 27 aliba European Union raksatsütsü tasa ka lir, ta ashi.

"Lukashenko-i inyakba

lendong ya Moscow nung yangluba lir, teyanglur ji Tir Putin lir," ta Morawiecki-i arütsülen security forces semdangba sülen Polish Parliament nung Mongulbarnü ashi.

Bodhbarnü Putin-i German Chancellor Angela Merkel dang EU züngsem linüktemi Belarus-Poland arütsü nung migrant tebilemtsü ya indang indanga Minsk den jembitsüla, ta ashi.

Merkel-i Putin dang Belarus-i migrant tem nisung masü ama amshir aser magizükteter ta ashi aser Minsk sorkar ajungshitsü asüngdanga liasü, ta German sorkar indang odongtar kati ashi.

Iba ama tensa ka nun glia Belarusian airspace nung senzütsü atema Moscow-i strategic bomber ana yoka lir.



Arlington, Va kübok Arlington National Cemetery nung aliba Tomb of the Unknown Soldier nung asürtem bilemetetba sentong ka agidang nüburtemi naru yutsüdang tangokba noksa nung angur.

FACSU ketdangpurtem melentepba sentong agiogo



Dimapur, Yimpoksüi/November 10 (TYO): 2021-22 session atema Fazl Ali College Students' Union (FACSU) ketdangpurtem menden melentepba sentong tanü College conference hall nung agiogo.

Iba sentong ya Dr. Imliwati Longkumer lenisüba nung agi, aser Vice-Principal, R. Arenla Aier-i lokti pela agizükba den FACSU Executive Council züngsem tasentem nem

tenüngsang agüja liasü. Sentong nung Tzulensa (General Secretary tejenba) aser Lanutangit (General Secretary tasenba) nati pei team tenüng nung o jemi aser FACSU ketdangpur tasentem nem mapa belenzüksüba sentong Mesutoba Ao-i (Convenor, Students' Advisory Committee, FAC) achaayanga agi.

Ketdangpurtem tasentem dang taruba NAAC Peer team-i college semdangtsü

aliba indang Dr. Lanurenla-i (IQAC Convenor) metetdaksü aser FACSU temzüng ozüing indang Nukshimoa-i (Member, Students' Advisory Committee, FAC) metetdakja liasü. Kasa mapang nung Dr. Aotemshi-i lenir tasentem atema sarasademja liasü, ta Information and Publicity Cell, Fazl Ali College, Dr. L. Imlinichet Imchen-i sangdong ka ajanga metetdaksü.

GPRN-i asükhu lemsatep

Dimapur, Yimpoksüi/November 10 (TYO): Government of the People's Republic of Nagalim (GPRN)-i sangdong ka ajanga Ashiho Chaomai (AC) Battalion, Naga Army, Commanding Officer (CO), Colonel Abraham Keitang, MM (Military Medal); Army No. KL-20470 asüba osang angazüka mang ayimba lemsatepogo. Pa mapang talangka shiranga liyar November 10 nü asü. Pa Wung Tangkhul Region (WTR) kübok Pushing yimtsüng nungi liasü. Pa Naga nung tenzüksü atema 1987 küm November 1 nü züngoksema liasü.

Pai Naga nung masü tashi masetshi bendanga agüja tenzüko. Pa asüba ya ajak asoshi takoksa aser pa melener angutsü tasak asütsü. Pai Naga nung atema bendanga agüja inyakba atema pa tenüng Naga nung puti otsü nung teti mangaoka ayutsü aser menungra bilemtetsü.

Naga Army, Longvibu-i pa nem November 10 nü Brigadier jenjang agütsüogo.

NSCN/GPRN-i (L) Brigadier Abraham Keitang, MM'er kinungertem den asükhu lemsataper aser mangyim jashi mapang par kibong nem tulusang Tsüngremi anisüngzüik agüjang ta sarasademtsür. Pa tanüla teti tatem makadak anisüngzükdakjang ta sarasademtsür, ta MIP, NSCN/GPRN-i sangdong ka ajanga lemsatep.

Tseminyu nung Mega Legal Camp ka ayonger

Dimapur, Yimpoksüi/November 10 (TYO): Additional Deputy Commissioner, Tseminyu, W. Manpai Phom-i sangdong ka ajanga Tseminyu sub-division nung aliba nüburttem dang, sorkar department balala den longjemer Kohima District Legal Services Authority (KDLA)-i ayongzüka November 13 nü Town hall, Tseminyu "Mega Legal Camp" ka agitsü sentong yanglur aliba metetdaksüogo.

Iba camp ya nüburttem nem tangazükba balala agütsütsü aser talisa lokti nung leni maortem nem angati legal teyari indang angazükdaksütsü aser nüburttem nem sorkar sentong/scheme balala indang metetdaksütsü nükjidong nung ayongzüko.

Sentong nung invakvimtem:

1. Child helpline- Awareness.
2. Senior citizen helpline- Registration (Senior citizens Association nung züngoksemnertemi sen 300 bener arutsü nüngdaker).
3. KDLA- Free legal counseling aser Affidavits angati agi yanglutsütsü (Income certificate, Name correction, etc.)

4. Health & family welfare- angati tenük check-up.
5. Social welfare- Schemes & Benefits.
6. Horticulture- pamphlets angati agi lemtsüba aser hadir amshiyim sayuba.
7. Animal husbandry & veterinary services- livestock vitamins angati agi lemtsütsü.
8. Banks (SBI, NSCB, Bank of Baroda)- Loan schemes, Insurance, etc.
9. Aadhaar& Requirements- Aadhaar enrollment, correction, Aadhaar card, Birth certificate, passport size photo.

Iba camp ya temalen shisema aliba inyakyim dak sendakba nung tangazükba balala angutsü atema nüburttem asoshi maongka tajung asütsü. Anungji nüburttem dang iba sentong nung jangrabangra arua shilem agitsü metetdaksüogo.

Chuchuyimlang Kaketshir Telongjem Dimapur aser Ao Kaketshir Telongjem Dimapur friendly futsal match ka November 09, 2021 aonung Jungyard Ground, Padumphukri nung asaya liasü. Iba asaya nung Dimapur Naga Students' Union tir, Moayangar Jamir-i süngo jemdakja liasü.



Dimapur, Yimpoksüi/November 10 (TYO): Deputy Commissioner aser DTF mendenbuba Tuensang Ramnikant Kumar, IAS-i, ki shiai oa Covid-19 vaccine agütsütsü atema November 9 nü Vaccination Express ambulance tenzüksüogo. Iba inyakyim ya Tuensang jila nung Covid vaccine mezüngbuba aser tanabuba dose magi alirtem bushi aotsü aser parnok nem tangazükba agütsüba den vaccine agütsütsü nünjidong nung tenzüko.

MENUNGRA BILEMTETER



ASÜR MRS. ZUTILA AO (MOPUNGCHUKET) TASÜBA ANOGO : 11.11.2020

Na iba akümüli toktsür tanü küm ka abensar, onok asoshi na tesangwa ka liasü. Nü temeim, taremsük aser tamang sarasadem onoki menungra bilemteter.

Onok molungjang nung Na Teti Lir.

- Temeim Chirnur, Semchir aser Kinungertem.

OFFICE OF THE MONGSENYIMTI LAISHIR TELONGJEM

P.O: Chuchuyimlang, Mokokchung, Nagaland

TENÜNGSANG AGÜTSÜR

Wb. Imbanglemba Ozüküm aser Wt. Masakala Jamir na jala Dr. Lipoknenla Ozüküm, shiba tang Christ for the Nation's Bible College, Kohima nung Assistant Professor teinyakdak lir, la ya Mongsenyimti Laishir rongnungi Tsüngrem o tarok rajema metetsü jangrabba aser sayutsü molungtetba tesayur tajung ka lir. Lai SATHRI, Senate of Serampore College & University nungi Dissertation "Digital Games and Children's Creative Imagination: Formulating a Pedagogy for the Churches in Nagaland" nung zülua Doctor of Theology (D.Th) renema Mongsenyimti Laishir Telongjem aser Mongsenyimti Sensosanger ajak nem konang nüngsang tulu bentsür aruba tepela tulu asoshi la nem tenüngsang tetushi agütsür. Tsüngrem o bushiba nung temaba jenjangi atuba ajanga ano la tenzüka mapa nunga takok tulu ngua inyaktetsü asen Laishirtemi yongyaseta sarasademtsüa atar. Tajung Tsüngremi na Pa tenzüka wadang asoshi tali moajangma.



Sd/- Wp. Lipoknungsang Ozüküm President, MLT

Sd/- Wp. S. Kümzüik Lemtur Gen. Secretary, MLT

Dimapur Lirmenlar Telongjem 16 Buba Lokti Senden



Anogo : 13th Nov, 2021

Mapang : 11:00 am

Tesentepdak : Klmen (Wt. S. Arepla)

Lengrijan, Grace colony

Nükjidong: "Telongjem nung Lokti terenlok asoshi"

* Iba senden nung züngsem ajaki pei kin sobutsü mera keta sobur arutsü mepishir.



Office of the MONGSENYIMTI SENSO MUNG DANG

B.P.O MONGSENYIMTI P.O. CHUCHUYIMLANG DIST: MOKOKCHUNG NAGALAND-798614

TAKOK NÜNGSANG YIMYIM:

Tsüngrem taochi yimlibilem akhüm kübok ajemalua nendaknendaka alima shisatsü bushiba nung mongin kumteta Dr. Lipoknenla Ozüküm-i (Wb. Imbanglemba Ozüküm aser Wt. Masakala Jamir Jala) Department of communication, Senate of Serampore kübok 'Digital Games and Children's Creative Imagination: Formulating a Pedagogy for the Churches in Nagaland' thesis takok nung renemteta Doctor of Theology (D.Th) naroküm nguteta Mongsenyimti sensosanger ajak nem nümadangtet nüngsang tulu bener arutsünung takoker nem tenüngsang tulu Mongsenyimti Senso Mungdang Mendenti ajanga agütsür.

Shisa tulu bushitetba temoatsü aser sempet tajung tarutsü lanu asensor asoshi tajangzüik süa amshitetsü takoker nem Tsüngremi maneni tabensa shisa moatsütsü sensosanger tem tamang sarasadem.

Sd/- (IMOTONG) President, MSM

Sd/- (OBANGONEN) Secretary, MSM

World War II Peace Rally ayonger

Dimapur, Yimpoksüi/November 10 (TYO): Department of Tourism, Government of Nagaland den longjemer Nagaland Adventure & Motor Sports Association (NAMSA)-i, 2010 küm nungi tenzuka Hornbill Festival mapang World War II Peace Rally kanga takok ngua ayongzuka arudar. Iba rally ya Kohima tongpang bilemtetsü atema ayongzuka agir. Rally ayonga agiba nukjiong tongtibangbaji yimjung aser telongjem

ajungkettsü atema lir. Kümtem tsüngda World War II Peace Rally ya Hornbill Festival mapang ajaki kanga sapuba sentong ka kümogo, aser linük kübok state balala nungi aser bendanglima nungia arua iba rally nung shilem agia arudar. Taküma iba rally nung India tesem balala aser Northeast kübok aliba state tem nungi nüburtemi arua shilem agitsü imlar. 11buba World War II Peace Rally ya Hornbill Festival mapang December 7

nü agitsü renema lir. Rara nung taküm bendanga agütsüba sepaitem nem tetushi agüja naro toktsüba sentong aser rally tenzükba sentong 11:00 ako nung Commonwealth War Cemetery, Kohima nung agitsü.

Iba sülen convoy ya Razhu Point, Phool Bari, PR Hill, Phesama ajanga orr 2nd World War Museum, Kisama, Naga Heritage village nung tembangtsü. Sempet agütsüba sentong nikongtsütsü 2:00 ako nung agitsü.

NZ series atema Rohit Sharma captain asütsü shimogo



Yimpoksüi/November 10, 2021 (Agencies): November ita 17 nü nungi tenzuka asayatsü aliba T20 asayamung atema India team captain asütsü Rohit Sharma shimogo. Iba asayamung atema asayartem Mongolbarnü sangdonga liasü aser asayartem rongnung Virat Kohli densema mali, shibai captain mapa tokja liasü. All-rounder Hardik Pandya aser Ravindra Jadeja aser pacer Mohammed Shami nungera iba asayamung atema meshim aser parnok ajak anisüngzüktsü atema mapang agütsüogo.

T20 World Cup nung India team-i junga masayateti tsükatonba sülen taruba asayamung atema asayartem sangdongba mapang asayar tasen anisemtsü imlaa liasü. Taruba küm Australia nung asayatsü aliba T20 World Cup temulung dang yur Ruturaj Gaikwad aser Venkatesh Iyer na team nung aniokogo. Tenapronglai taküm IPL nung kanga junga asayaa liasü.

Team nung Pandya-i over aika monteti lemtar aliba

mapang Iyer shimba ya kanga tongtibang asütsü, kechiyong tanga fast-bowling all-rounders ka atema tang asayar asadanga mapang ka lir.

Squad nung ano asayar tejen Yuzvendra Chahal aser pacer Mohammed Siraj nata züngosemogo aser Harshal Patel tang mezüngbuba India team nungi asayatsü atema anisemogo.

Rohit nem captain mapa agütsütsü imlaa liasü aser kasa mapang nung T20 atema KL Rahul nem assistant captain mapa agütsüogo.

India aser New Zealand ya November 17 nü nungi tenzuka T20 asem asayatsü.

Asayartem:

Rohit Sharma (Captain), KL Rahul (Vice-Captain), Ruturaj Gaikwad, Shreyas Iyer, Suryakumar Yadav, Rishabh Pant (wicket-keeper), Ishan Kishan (wicket-keeper), Venkatesh Iyer, Yuzvendra Chahal, R Ashwin, Axar Patel, Avesh Khan, Bhuvneshwar Kumar, Deepak Chahar, Harshal Patel, Mohd. Siraj.

Küm 24 sülen Australia team Pakistan nung oa asayatsü

Yimpoksüi/November 10, 2021 (Agencies): Küm 24 shi lir tang mezüngbuba taruba küm Australia team Pakistan nung oa test asem, one-day internationals asem aser Twenty20 international ka asayatsü, ta Pakistan Cricket Board-i metetdaksü.

Karachi, Rawalpindi aser Lahore nung March ita test asaya asem asayatsü aser limited-overs asayatem ajak March 29 nungi April 5 nü tashi Lahor nung asayatsü.

Test asayatem ya World Test Championship nung shilem ka asütsü. ODI asayatem ya World Cup Super League atema asütsü.

1988 küm Pakistan nung tatemsa test asayaba mapang Mark Taylor lenisüba nung Australia-i 1-0 agi iba asayamung koka liasü. Iba sülen Pakistan-i ayongzuka team ana tsüngda Sri Lanka aser United Arab Emirates nung pezüben tashi asayaogo. "Australia ya team tajungtiba rongnung ka lir aser küm 24 sülen tang mezüngbuba

parnok ozü lima arua asayaba ya fan tem atema jangrademtsüka asütsü," ta PCB mendenbuba Ramiz Raja-i ashi.

2009 küm March ita Lahor nung Sri Lanka team bus amakba sülen küm ter shi international cricket ayongzuka asayatsü atema Pakistan nem tenokdanga agütsür liasü. Iba lendong nung nisung ti asü aser Sri Lanka nung asayar aika yirua liasü.

2011 Cricket World Cup ayongzuka asayatsü atema co-host jenjanga Pakistan ket nungi agin.

Tenokdanga agintsüba sülen Sri Lanka team-i mezüngbuba 2019 küm December ita Pakistan semdanga test asaya aser iba sülen Bangladesh aser South Africa na anidak. Tanga team tema limited-overs series asayatsü atema Pakistan-iogo.

Cricket Australia chief executive Nick Hockley-i, taruba küm asayamung atema PCB-i sentong tajung yangluba atema parnok tenüngsanga

ashiba agi, inyakyim ajak tembanga inyaksü atema longjemer inyaksü yongyaa atar.

Kasa mapang nung PCB-i ashiba agi, Cricket Australia nungi ketdangsürtemi Pakistan semdanga sorkar ketdangsürtem den ajuruteptsü aser inyakyimtem tembanga jembishinütsü.

Pakistan aser Australia na Brehostibarnü Dubai nung T20 World Cup semifinal nung asayatsü.

Maneni Dec. 13 nungi 22 tsüngda Pakistan nung West Indies den T20 asem asayatsü renema lir. 2018 küm April ita asayaba sülen West Indie-i tang mezüngbuba Pakistan semdangtsü.

Pakistan aser Australia na asaya mapanglem:

March 3-7: 1st test; Karachi March 12-16: 2nd test; Rawalpindi

March 21-25: 3rd; Lahore March 29: 1st ODI; Lahore March 31: 2nd ODI; Lahore April 2: 3rd ODI; Lahore April 5: T20; Lahore.

Domestic Badminton Season taruba ita tenzüktsü

Yimpoksüi/November 10, 2021 (Agencies): Ita 20 tashi masayai arur taruba ita senior ranking Level 3 asayamungtem asayaa domestic badminton season tenzüktsü, ta national federation-i Bodhbarnü sangdongogo.

Domestic badminton season ya Chennai nung December 16 nungi 22 tashi mezüngbuba asayamung asayaa tenzüktsü aser iba sülen December 24 nungi 30 tashi Level 3 asayamung tanga ka Hyderabad nung asayatsü. Badminton Association of India (BAI) indang domestic format tasenba dak ajemdaker asayamung anaprongla nung senpet sen lakh 10 agütsütsü. Iba format ya 2019 küm agizük saka COVID-19 wara poktetba ajanga benoka minyakteti liasü. Chennai nung asayamung atema tenüng züngoksemtsü asoshi tatembangbuba anogoji

November 24 aser Hyderabad asayamung atema tatembangbuba anogoji December 1 asütsü.

BAI secretary Ajay K Singhania-i ashiba agi, COVID dak sendakba inyakyim ajak benoker domestic season tenzüktsü aser asayartem ajaki RTPCR negative reports bena alitsü nüngdaker.

"COVID yagi saisapong dang masü saka libaliro ajak nung kongshir, saka Indian domestic badminton season tenzükshiba pelashishia sangdonger. India nung world-class asayartem kar lir aser asayartem ajak court-i tanaben meyipa arutetba ya badminton fraternity ajak atema osang tajung," ta pai ashi.

Senior ranking asayamungtem ya jenjang asem; Level 3, BAI Series Badminton Tournament (küm nung 6); Level 2, BAI Super

Series Badminton Tournament (küm nung 4); Level 1, BAI Premier Super Series Badminton Tournament (küm nung 2) küma lemsa lir.

Domestic senior ranking nung ajak senteper senpet sen crore 2.2 agütsütsü aser Level 3 category asayamungtem nung senpet sen lakh 10 agütsütsü. Kasa mapang nung Level 2 asayamungtem atema senpet sen lakh 15 aser Level 1 asayamungtem atema senpet sen lakh 25 agütsütsü.

Item asayamungtem asayaba sülen Nationals asayatsü, kong senpet sen lakh 50 agütsütsü.

Aayartem atema senpet tajung agüja parnok ajangzükdaksüba dang masü saka iba format benokba ajanga domestic circuit nung tetoktepba tali kümdakja asayar timba main circuit-i aitdaksütsü nukjiong lir.

Tebur U25 state A team sangdongogo

Dimapur, Yimpoksüi/November 10 (TYO): Mens U25 State A One Day Trophy 2021-22 atema Nagaland Cricket Association-i tebur U25 State A Cricket Team list sangdongogo.

Asayartem yamai alitsü:

Akavi A Yeptho (captain)
Tohuka Zhimo (vice captain)
Shamphri Terang
Sanjay Shiva
Hiketo Aye
Nchumbemo
Shamwang Konyak
Renben Odyuo
Mynul Haque
Saurav Kumar
Parbez Alom
Imtizingtet
Sunil Sharma
Inoto Yepthomi
Peteneizo Rupreo
Temsulong
Ruokuotuolie Angami
Arsashi Imsong
Viketuolie Kuotsu

Lanunochet
Support staff:
Keneizetso (team manager & Asst. coach)
VVV Apparao (team coach)
Swadesh Nagre (team S & C coach)

Mowalong Kichu (team physio)

Asayatem:

* 17-11-2021: Nagaland vs Manipur
* 18-11-2021: Nagaland vs Arunachal Pradesh
* 20-11-2021: Nagaland vs Meghalaya
* 21-11-2021: Nagaland vs Mizoram
* 23-11-2021: Nagaland vs Sikkim
* 24-11-2021: Nagaland vs Assam.
Asaya ajak Guwahati nung asayatsü, ta NCA Hon. Secretary, Hyunilo Anilo Khing-i sangdong ka ajanga metetdaksü.

BILEMDANGANG

"Meyilongi dang süaka tanen makai inyakang."